

贛州府志卷四十一

藝文志

奏疏

梁

爲褚秦讓封南康郡公表

任昉

一日被司徒符印稱詔二日許臣兄賁所請以臣紹封南康郡公臣世屬啟聖運偶時來尚德疇庸先錫土宇臣賁載世承家兄居長德而量已夙退內事園蔬以臣行達幽明早酷荼苦賁天倫寘至友愛淳深非直引壻推溫故能逃迹讓位鞠育提養以及人次事死讓生尚均脫屣取信十室本若錙銖乃遠謬推恩近霑庸薄能以國讓宏義有

贛州府志

卷四一

奏疏

一

歸匹夫難奪守以勿二昔武始迫家臣之策陵陽感鮑子之言張以誠請丁爲理屈且大宗絕緒命臣出纘傍統稟承在昔理絕終天永懷情事觸感崩裂伏惟陛下俯權孤門哀榮之重爰奪臣賁一至之輕察其丹欵特賜停絕至公允穆微臣克幸

爲南康王讓丹陽尹表

庾肩吾

臣聞劍鏤七星非有司天之用簾圖五嶽寧識崇朝之雲是知策彼泥龍不能令其逐日乘斯流馬安可使其奔霆方今振鷺盈廷白駒空谷惟帝念功惟明克允君子之國幸聞其讓石門之水獲免於貪

宋

知虔州到任謝上表

趙抃

臣伏奉勅差知虔州軍州事已於今月十三日到任訖亡狀立朝日虞公議之迫以言得郡恩出宸俞之優內省孤疏但深榮懼臣某中謝伏念臣愚不可進學無所長忝位朝闈濫巾憲府獨謂君恩之足報孰知身計之爲謀二浙守麾撫俗庶幾於樂職兩川將漕竭誠幸免於瘵官豈圖帝檢之來俄有諫垣之召念拾遺補闕之寄非鉗口結舌之司若言行計從雖久次臣謂可也苟備員承乏或驟遷臣實羞之懼失諍臣之風願爲劇郡之請俯從私欲仰荷朝僉且虔雖遠方而衢乃便道過家上冢懇章得盡於哀榮跋山涉川之任敢辭於艱險而况樞臣報罷物議有歸

贛州府志

卷四一

奏疏

二

廣聖君從諫之名遂微臣納忠之志實寒士逢時之盛獲諫官出守之榮自惟所得之已多尚虞不稱之貽誚斯盖伏遇皇帝陛下涵容光大仁聖聰明求治則亟以思賢人好問未嘗深罪言者不棄芻蕘之賤俾分符竹之權惟茲贛川控彼南粵負販常爲群盜不下一千餘人疆畛最遠他邦動經八九百里刑無虛日俗未嚮風臣敢不勤瘁公家謀惟夙夜頒宣寬詔撫馭遠人勿煩南顧之憂少酬北闕之寄

論虔州盜賊劄子

李綱

臣契勘本路虔吉二州民素強悍狃於爲盜結集兇黨千有爲群出沒江西廣東福建數路作過雖朝廷節次遣兵

或招或捕至今徒黨依舊猖獗多於虔州管下諸縣擇要害地建置寨柵蜂屯蟻聚窺伺間隙攻陷州縣爲害不細一路營兵進討則散入他路諸路官兵進討則深入巢穴依負險阻卒難討蕩官軍既退則復出爲惡而又諸路軍馬無所統一乍前乍卻心力不齊非設方畧使諸路之兵節制歸一難以成功伏望聖慈特降睿旨令江西廣東福建三路軍馬一處節制諸路各應副錢糧江西兵屯虔吉州廣東兵屯循梅州福建兵屯汀州禁其出沒抄掠因利乘便會合掩擊討蕩巢穴或因兵力招撫出降以次酋首并強壯人充軍前使喚使數路良民早得奠居不勝幸甚

申督府密院相度措置虔州盜賊狀

贛州府志

卷四一

奏疏

三

契勘虔賊舊年止是冬月農隙之時相率持杖往廣東販鹽圖利後來漸次於循梅等州村落間劫掠巡尉不敢誰何徒黨漸衆遂犯州縣至建炎四年宮省移在虔州陳大五長嘯聚作禍當時官司措置無策賞罰失當土豪有物力之家往往嘯聚結集報復讎怨頭項漸多州縣不能制禦連結滋蔓以至今日雖遇豐年亦不衰息其說有二一則虔民賦性獷悍喜於爲盜易爲結集動以千百爲群凌逼州縣不畏刑法不顧死亡循習成風異於諸路盜賊二則自近年以來專務招安官司失於措置如招安到賊夥首領盡補官資放散徒黨其徒黨中桀黠者又復糾集徒衆自爲頭首以俟招安復得名目遞相倣倣無有窮已其

招安出首領雖已補授官資或與差遣多是不離巢穴不出公參依舊安居鄉土稍不如意則又相率爲盜以此滋蔓雖痛遭屠戮亦不改悔今來朝廷欲措置虔寇不過招捕兩事臨以重兵有以制其死命然後可以招撫務令措置合宜乃爲得策今虔寇巢穴多在江西福建廣東三路界首置立寨柵爲三窟之計一處有兵則散往他處官軍既退則又復團聚中間遣發軍馬卒於不能窮討正以節制不一之故若節制歸一使其不能散逸且捕且招威令既行則窮寇別無他策必須自歸然後結以恩信使之改過自新將爲首及徒黨桀黠之人盡赴軍前使用以除後患此最策之上者綱昨曾陳情乞於江西路置都統制一

員節制三路軍馬以招捕虔賊蒙朝廷許令本司辟置然本路軍馬單弱不足以副都統制之名如蒙朝廷遣發防秋軍馬使本路兵勢稍壯方可辟官充上件差遣使統三路之兵以措置虔寇既以兵力招降乃可使之遠去巢穴以消永久之患應招安到賊夥除放散脅從羸弱之人外其頭首及強壯桀黠之人並令解發赴軍前使喚頭首與補正官資及有功優與旌賞或又作禍必殺無赦其不能悛改逃亡復歸本土之人許諸色人捕斬籍沒田產編配妻子以係累其心使知爲盜之無益自然不敢復爲頭首則虔人喜爲盜之風漸次可銷昨韓世忠既破范汝爲其頭首及強壯人並將帶隨軍前去所以建州數年無盜賊

之虞者正以措置得宜至於盜賊衰息之後又須縣令得人勞心撫字使作禍桀黠之人既去良民得以復業乃可化盜區爲樂土此又不可後也

乞差兵會合措置虔寇奏狀

契勘虔州管下盜賊多是舊來招安已受官資及已有差遣不曾起發赴任離去巢穴之人近緣知州孫佑措置討捕有討捕之意無討捕之術謀慮不密漏泄事機致令皆懷反側結集復行作禍如周十龍張大閑謝凱尹寶謝小鬼等頭項不一多者數千人少者數百人遞互入夥劫掠鄉村殘破縣邑虔州管下如興國雩都虔化瑞金等縣逼近州城又於太和萬載縣界內盤泊作禍本司遣發申世

贛州府志

卷四一

奏疏

五

景下將官馬仙及統領官王彥將官王勝等會合討捕近據虔州將官曹綱及統領官王彥虔州將官何榮將官馬仙殺敗賊徒生擒解勘已具逐項因依申朝廷外竊緣近來周十龍與謝小鬼尹寶殘黨及自餘賊徒丁二十一謝二十八花張細計明寶丁和尚呂添男謝凱陳八梗廖車頭十等互相合夥人數衆多雖累次殺敗尚未衰息近蒙朝廷差到福建路統制李貴下軍馬前來會合今月初二日據李貴申將帶所部軍馬已劄吉州踏逐官屋及寺院屯泊並應副錢糧外契勘虔賊累年出沒作禍正如溪洞蠻人不復知有王化致令虔州一州財賦催理不行傍近郡縣皆被其毒爲害甚大若朝廷必欲掃蕩巢穴窮究根

株爲一勞永逸之計非壓以重兵且招且捕將招出頭首并桀黠徒黨押赴軍前使喚使良民漸次歸業未見其可兼虔州南安軍見有廣南劉宣湖南李才古政譚城鄧宣芳正等賊徒各數千人頭項不一李貴軍馬人數不多未可全然倚辦竊見湖北京西路宣撫使岳飛下軍將多在鄂州屯駐見於本路起發錢糧前去應副若乘此邊境寧息別無探報之時選擇得力統制統領官摘那數千人前來本路就糧權聽本司節制令與李貴及本路兵將會合措置不數月間決可平殄將來盜賊既平之後亦須且留李貴軍馬屯泊吉州與本路兵將相爲表裏彈壓使殘黨不敢復出嘯聚作禍或有作禍之人即時討殺此爲得策

若目前討捕不遣重兵只據見在兵將竊緣賊夥數多官軍有限勢力疲乏別無策應難以成功若將來賊平之後不別屯軍馬但以虔賊付之本路兵力單弱必致殘破州縣屠害生靈爲患不細兼虔吉州殘破縣分賊平之後亦合體究着實蠲放租稅使民戶得以安業除已遣二朝奉郎本司幹辦公事韓岳請朝廷稟議外伏望聖慈特降睿旨令朝廷詳酌措置施行

知贛州到任謝表

文天祥

九重選牧錫類天寬千里承流奉親地近昉共侯度丕戴王休伏念臣某才本空疎分安孤苦身逢盛代夙自勵於丹心家有重親晚相依於白髮頃叨漢傳徃即楚封何敬

非刑麤殫審克不違將母私切懷歸嘗懇懇以陳情冀高
高之從欲遄蒙異渥特昇近麾繼頒旨以趨征已鞠躬而
祇上祿及一門之微賤恩同大造之生成茲盖伏遇皇帝
陛下以堯舜之資行曾閔之道嗣寧王之大歷毖我成功
奉太后之萬年與天齊壽遂使忝求芻之寄亦獲供啜菽
之歡臣敢不老老及人親親爲政由家達國期興遜以興
仁以子移臣寓爲忠於爲孝

明

征勦機宜疏

王 瓊

看得御馬監太監畢真奏稱先年都御史俞諫巡撫南贛
等處一遇有警會同鎮守太監黎安動調人馬今都御史

贛州府志

卷四一

奏疏

七

王守仁不行會同鎮守太監許滿誠非舊規乞要請勅前
去會行所屬地方凡遇征勦遵照舊例以便行事一節先
年爲因廣東湖廣福建江西四省交界地方賊情各該鎮
巡官員不能遙制以此議設都御史一員專在汀贛二府
駐劄凡事許徑自區畫便於勦除盜賊也其都御史俞諫
巡撫南贛之時爲因江西腹裏流賊生發事有相干以此
會同江西鎮巡撫計議行事近日都御史王守仁征勦南
贛地方強賊以此不會江西鎮巡官今若將南贛地方盜
賊事情又欲會同江西鎮守太監方纔施行彼此牽制坐
失事機不如將提督南贛都御史革去止令江西鎮巡官
自行之爲愈也况鎮守江西太監原奉勅諭行事自有舊

規並無另請勅書會同南贛都御史事例若准所奏鎮守山西太監該請勅會同巡撫延寧等處都御史係干體統決難輕准該請勅會同巡撫延寧等處都御史王守仁今後遇有江西合無本部行文提督軍務都御史王守仁今後遇有江西湖廣廣東腹裏地方盜賊嘯聚應該會合勦除或動調腹裏府衛州縣軍兵錢糧應與各該鎮巡官會議者仍照原奉勅旨計議而行其南贛地方一應軍機事務遵照節次題奉欽依事理徑自區畫施行不許推託因而失悞軍機罪有所歸

申明賞罰以勵人心疏

照得近年各處盜賊生發所在官司徃徃隱匿不行奏報

贛州府志

卷四一

奏疏

八

以致滋蔓難制卻又倡爲招撫之說長奸縱惡莫有哀息及乎招降復叛乃至動調京邊官軍始克平定勞師費財不可勝計今都御史王守仁反覆辨論深切著明具見本官有用之學濟世之才及照昔因江西南贛二府福建汀漳二府廣東南雄惠州潮州韶州四府并湖廣郴州四境相接之處素爲盜賊淵藪數爲民患不可盡除比之尋常盜賊迥然不同以此議奏特設都御史一員兼治四省地方雖以巡撫爲名實則提督軍務是以原奉勅旨民情事務不必干預然以巡撫爲名而不與民事以禦盜爲職而不得兵權故官雖設而職難盡民受害而盜未息不如不設此官專責各省巡撫官之爲愈也是今彼處盜賊幾至

數萬殘害地方已調兵會勦雖嘗擒殺未必能盡大兵一
退必又嘯聚王守仁所奏前事皆有明驗若不責成此官
假以兵權申明賞罰誠非久安長治之術也合無請勅南
贛等處都御史假以提督軍務名目照提督軍務文臣事
例給與旗牌應用以振軍威一應軍馬錢糧事宜照依原
擬徑自便宜區畫文職五品以下武職三品以下徑自拏
問發落如遇盜賊入境劫掠即便調兵勦殺不許踵襲舊
弊招撫蒙蔽重爲民患所部官軍若在軍前違限逗遛退
縮者俱聽以軍法從事生擒益賊鞫問明白亦聽斬首示
衆其陞賞事宜除征勦流賊事例先已奏革外若南贛郴
桂等處斬賊級聽本處兵備副使會同該道守巡官即時
贛州府志

卷四一

奏疏

九

紀驗明白備行江西按察司造冊奏繳查照南方勦蠻賊
見行舊例議擬陞賞

議南贛商稅疏

王守仁

據江西按察司分巡嶺北道兵備副使楊璋呈奉巡撫江
西地方右副都御史孫燧案驗備行各道兵備等官有地
方重大軍務益於政體便於軍民果係應議事件即便條
列呈報以憑施行等因隨據南安府呈繳本年春季分折
梅亭抽分商稅循環文簿看得該府造報冊內某日共抽
稅銀若干不見開有某商人某貨若干抽銀若干中間不
無任意抽報情弊及看得一季總數倍少於前原其所自
蓋因抽分官員止是典史倉官義民等項不惜名節惟嗜

貪污兼以官職卑微人心玩視以致過往客商或假稱權要而挾放或買求官吏而帶過及被店牙通同客商買求書算以多作少以有作無奸弊百端卷查前項抽分創於巡撫都御史金澤一則甦大庾過山之夫一則濟南贛軍餉之用題奉欽依遵行年久又查贛州龜角尾設立抽分廠建白於總制都御史陳金自正德六年十一月二十七日起至九年七月終止共抽過商稅銀四萬二千六百八十六兩六錢三分零本省大帽山姚源華林盜賊四起大舉夾攻一應軍餉俱仰給於此并未奏動內帑之積亦未科派小民之財以此而觀則商稅之有益地方多矣緣贛州之稅正德十一年該給事中黃重奏稱廣貨自南雄經

南安折梅亭已兩稅矣贛州之稅不無重複已經勘明停止贛河之稅近復大舉夾攻軍餉仰給全在折梅亭之稅今所入如此非惟軍餉無益實惟奸宄是資隨會同分守左叅議黃宏議照合將南安之稅移於龜角尾抽分既有分巡道之監臨又有巡撫之統馭訪察數多奸弊自少其大庾縣僱夫銀兩合令該縣每季具印信領狀赴道批行贛州府支領支盡查算准令復支如此非惟大庾過嶺之夫不缺而軍餉之用大增合就會案呈詳等因據呈到臣看得南贛二府商稅皆因給軍餉裕民力而設折梅亭之稅名雖爲夫役而實以給軍餉龜角尾之稅事雖重軍餉而亦以裕民力兩稅雖若二事其實殊途同歸但折梅亭

雖已抽分而龜角尾又復致詰未免有留滯之擾况監司既遠胥滑得以恣其侵漁頭緒既多彼此得以容其奸隙若革去折梅亭之抽分而總稅於龜角尾則事體歸一奸弊自消非但有資軍餉抑且便利客商盖分合雖異而於商稅事體無改纖毫轉移之間而於民商利害相去倍蓰除臣欽遵節奉勅諭一應軍馬錢糧事宜俱聽便宜區畫事理將副使楊璋等所議行令該府一面查照施行外緣係地方事理爲此具本題知

南贛擒斬功次疏

據江西按察司整飭兵備帶管分巡嶺北道副使楊璋呈據統兵等官南安府知府季敦呈鮮生擒大賊首一名陳

贛州府志

卷四一

奏疏

十一

曰能從賊林泉等二十七名斬獲首級十六顆俘獲賊屬男女十三名口及馬牛等物并開稱搗過禾沙坑船坑石圳上龍狐狸朱雀黃石等賊巢七處燒死賊徒不計其數并房屋禾倉三百餘間南康縣縣丞舒富呈鮮生擒大賊首一名鍾明貴從賊曾能志等二十一名斬獲首級四十五顆殺死未取首賊一百一十七名俘獲賊屬男女一十六名口及牛馬驢等物并開稱搗過石路坑白水崗杞州坑旱坑茶潭竹壩皮袍樟木坑等賊巢八處燒死賊徒三百四十六名并燒燬房屋禾倉四百七十餘間贛縣義官蕭庚呈鮮生擒大賊首一名唐洪從賊蒲仁祥等六名斬獲首級并射死賊從一百三十八名燒燬賊巢房屋禾倉

一百二十間及俘獲牛羊器械等物并開稱搗過長龍鷄湖楊梅新溪等處賊巢四處通查得各哨共計生擒大賊首三名首從賊徒五十四名斬獲首級六十八顆殺死射死賊徒二百四十餘名燒死賊徒二百餘名搗過巢穴一十九處燒燬房屋禾倉八百九十餘間俘獲賊屬男女二十九名口水黃牛馬驢羊一百四十四頭匹隻等因轉呈到臣卷查先據副使楊璋呈稱據南安府并上猶等縣及縣丞舒富各呈由訪得大賊首謝志瑚號征南王糾率大賊首鍾明貴蕭規模陳曰能唐洪劉允昌等約會樂昌高快馬等大修戰具并造呂公車欲先將南康縣打破聞知廣東官兵盡調征勦府江就行乘虛入廣等因已經批仰

該道部勒諸軍酌量賊巢強弱派定哨分選委謀勇屬官統兵密召知因向導引領晝伏夜行刻定於六月二十日子時入各賊巢同時舉火併力奮擊務使噍類無遺去後今據前因覆勘得前項賊巢委果蕩平殆盡蓄積委果焚燬無遺獲功解報雖少殺傷燒死實多猖熾之勢少摧不軌之謀暫阻居民得以秋穫地方亦爲一寧此皆遵依兵部申明律例事理仰仗天威官兵用命之所致非臣之知謀所能及也臣惟南贛之兵素不練養見賊而奔則其常態今各官乃能夜入賊巢奮勇追擊在他所未爲可異之功於南贛則實創見之事及照副使楊璋區畫贄理比於各官勞勩尤多今夾攻在邇伏乞特加勸賞以作興勇敢

之風庶幾日後大舉臣等得以激勵人心除將獲功人員量加犒賞生擒賊徒監候審決首級梟示俘獲賊屬領養牛馬賞兵有功人員查審的確造冊奏繳外緣係斬獲功次事理爲此具本題知

議夾勦方畧疏

據江西嶺北道副使楊璋呈奉臣案驗准兵部咨該巡撫湖廣都御史秦金題爲緊急賊情事備行計處兵糧約會三省將上猶等處賊巢尅期九月中進勦等因遵依隨將本道兵糧事宜計呈本院轉達奏聞定奪外隨據南安府上猶大庾等縣申稱賊勢猖獗乞要早爲撲勦等因已經呈蒙本院密授方畧行委知府季敷縣丞舒富等領兵分

勦生擒首從賊徒斬獲賊級殺死燒死賊衆搗破賊巢俘獲賊屬等情通經呈報又蒙本院慮賊必將乘間復出行委知府季敷指揮來春等統兵屯南安指揮姚璽縣丞舒富統兵屯上猶指揮謝泉千戶林節統兵屯南康各於要害去處往來防勦至七月二十五日賊首謝志珊果復統衆一千五百餘徒攻打南安府城各官督兵迎敵生擒賊犯楊鑾等七名斬獲首級四十五顆賊衆大敗而去八月二十五日賊首謝志珊又統兵二千餘徒復來攻打南安府城各官督兵迎敵生擒賊犯龍正等四十二名斬獲首級一百五十七顆賊又大敗而去即今賊勢少挫若乘此機會直搗其巢旬月之間可期掃蕩但聞湖廣之兵既已

齊集而廣東因府江班師未久復調狼兵未有定期謹按地圖江西之南安有上猶大庾桶岡等處賊巢與湖廣桂東桂陽接境夾攻之舉止該江西與湖廣會合而廣東止於仁化縣要害把截夾攻不與焉贛州之龍南有泃頭賊巢與廣東龍川接境夾攻之舉止該江西與廣東會合而湖廣不與焉廣東樂昌乳源賊巢與湖廣宜章縣接境惠州賊巢與湖廣臨武縣接境仁化縣賊巢與湖廣桂陽縣接境夾攻之舉止該湖廣廣東二省會合而江西止於大庾縣要害把截夾攻不與焉名雖三省大舉其實自有先後舉動次第不相妨礙若必待三省之兵齊集然後進勦則老師費財爲害匪細合將前項事宜約會三省以次漸

舉庻兵力不竭糧餉可省等因據呈到臣看得三省賊巢連絡千里雖聲勢相因而其間亦自有種類之分界限之隔利則爭趨患不相顧乃其性習誠使三省之兵皆已齊備約會並進夫豈不善但今廣東狼兵方自府江班師而歸欲復調集恐非旬月所能兩省之兵既集久頓而不進老師費財意外之虞乘間而起誠使先合湖廣江西之兵併力而舉上猶諸賊逮事之畢廣東之兵亦且集矣則又合湖廣廣東之兵併力而舉樂昌諸處逮事之畢江西之兵又得以少息矣則又合廣東江西之兵併力而舉龍川方其併力於上猶則姑遣人佯撫樂昌諸賊以安其心彼見廣東既未有備而湖廣之兵又不及已苟幸旦夕之生

必不敢越界以援上猶及夫上猶既舉而湖廣移兵以合
廣東則樂昌諸賊其勢已孤二省兵力益專其舉之益易
當是之時龍川賊巢相去遼絕自以爲風馬牛不相及彼
見江西之兵又撤意必不疑班師之日出其不意回軍合
擊蔑有不濟者矣臣竊以爲因地之宜先後合擊之便除
臣遵照兵部咨來題奉欽依會兵征勦亦聽隨宜會議施
行事理已將前項事宜咨移廣東湖廣總督巡撫等官知
會一面相機行事外緣係地方緊急賊情事理爲此具本
題知

勦除山寇事宜疏

陸 穩

臣體得廣東饒平縣賦首張漣等大埔縣賊首蕭雲峯等

贛州府志

卷四一

奏疏

十五

程鄉縣賊首林朝曦等往來福廣境上彌滿充斥動以萬
計道路爲梗兵至則遯入巢穴兵退則復肆剽掠作患日
久地方漸不能堪各該督撫等官非訓兵振旅大彰討賊
之舉掃除巢穴則無以收平蕩之功而其禍未已也臣竊
謂今日之事不患無兵而患無糧不患賊巢之難搗而患
事權之不專所有事宜二款上呈聖覽一曰明職掌臣竊
惟天下之事勢一則專勢分則散南贛軍門界四省之邊
其勢已分屬矣前此承平之時以無事處事諸路有司不
責以苛禮任其以秦越視之至今遂成不相聯屬之勢然
昔猶可言也今日何日盜賊縱橫於江閩諸郡而一夕不
能安寢矣雖合勢以爲一猶恐口支而况猶秦越乎哉匝

所言者非以爭有司奉行之體也除盜以兵用兵以糧江廣錢糧皆有巡撫司之固舊制也福建未有巡撫之先汀漳與南贛一也自有巡撫以來有司但知有彼省之軍門而不知有臣兵馬錢糧一聽彼省之軍門調遣支用而不及於臣臣之所有者不過贛州在營之機兵千餘不解之鹽稅二分耳及其盜賊一至則又曰此非我事也南贛軍門事也權則已去禍則獨諉空文相加雖切何補臣及今不言是猶卻行而求及前人也臣謹按地圖計道里漳州之去省也可五六日而至去贛則月餘矣汀州之去贛也可七八日而至去省則月餘矣行者以月計則文移往復必兩月而始相聞兵行一日四十里半於行者則調發應

援亦必兩月而始至地不相及而賊情倏往倏來即有分巡漳南道其勢不能兼理也雖理之可即濟乎以此推之既有福建軍門則南贛軍門之不可兼漳州也明矣臣請以漳州一府聽福建軍門專理以免彼此牽制之患以絕互相推避之嫌其漳南道及湖廣之上湖南廣東之嶺東南韶等道兵馬錢糧凡脩勦寇之用者皆許臣專制應面授方畧者以期來見應文移請詳者允而後行諸道不得以彼省之意向觀望於其間如仍秦越相視者聽臣叅奏處治庶乎事權既專而展布亦易盜賊不足平矣二曰增軍餉臣查得正德五年都御史周南征大帽山諸巢請征福建布政司屯糧折銀附海依山鹽價與贓罰等銀正德

二年都御史王守仁征南安諸巢請支江西布政司南糧折銀并諸郡贓罰等銀各數萬兩俱克成功蓋天下之勢不至於極壞不可爲之地則不肯破格以收權宜之計今賊黨既盛三省合勦非用兵三萬不可也以旬月計非用糧十萬不可也贛州鹽稅除八分解京外每年所餘可四千兩耳兵法曰行師十萬日費千金計每人每日銀一分猶尚如此今官兵行糧每日二分而犒賞牛酒之費不在是焉則今之所費五倍於古二分鹽稅僅可供三五日之費而已前都御史楊伊志請留鹽稅一半者非不知南贛事勢之急而姑以緩戶部之催解也戶部之許三分者欲以濟三邊之急而未知南贛之急尤甚也疆場莫非朝

廷之士鹽稅解留莫非濟兵糧之用何擇於南何擇於北今日之事可謂極敝雖使才如周南王守仁者爲之尤須假以便宜方克有濟何況臣愚安得不束手無措倘棄贛州之所有者不爲請留而欲如先臣借支別項之所無者勢益難矣傳曰今有受人之牛羊而爲之牧者則必爲之求牧與芻求牧與芻而不得則反諸其人抑亦立而視其死與今日之事頗類於此蓋規避之罪小坐視之罪大臣以此自決矣伏乞勅下戶部仍將前四年鹽稅通議留作軍餉自四十年以後量留三分庶乎食足兵強智者效謀勇者效力而盜賊不足平矣

題爲官兵血戰搗平逆賊飛報捷音事按查嘉靖四十一年十二月初四日前督陸穩准兵部咨該兵科抄出江西贛州府龍南縣民容權等奏稱本縣密邇廣東和平賊巢賊首李文彪僭稱岑王糾集本縣賊首謝允樟賴清規封爲二王三王動輒殺人如草菅攻城爲常事蒙江西巡按徐御史奏請征勦欽奉聖旨這賊衆着南贛提督軍門調集官兵驅勦欽此一向未蒙施行致賊得肆猖獗又該縣民黃祐宋梅等各奏稱賊首李文彪賴清規謝允樟各僭稱王號攻城殺人肆無忌憚乞兵勦除以靖地方等因俱奉聖旨兵部知道欽此欽遵通抄送司按呈到部擬合通行查勘備咨本院照依條奉欽依內事理會同分守道并

南贛總兵議兵征勦檄行兵備道李佑調發長沙營把總署指揮僉事暴以平等官兵共三萬一千員名從龍南關西進又行安遠縣管縣事同知李多祚統領千戶楊照百戶黃瀾任桂嚴約陳佩主簿應本泉典史嚴潮報效生員杜祿調發黃鄉葉楷丹竹樓何玉環并太平五堡謝遵矩等兵夫共二萬二千員名從安遠天花寺進分搗下歷賊首賴清規等并伯洪大小石等處各賊巢穴又調各路兵民把截險要隘口又委贛州府知府黃宸南安府知府吳炳庶及兩府同知推官各屬知縣催運糧餉臣謹移鎮信豐親督諸軍牌行各枝官兵俱以叅將蔡汝蘭統領刻限本年六月初三日寅時前進各官兵進勦去後今准據各

呈報搗平下歷巢穴馘斬俘獲前因爲照下歷賊首賴清規等依憑險阻負固有年茲者仗鉞親臨運籌密授渠魁生縛黨類殲平百年之狡窟焚勦無遺萬仞之險巢蕩平俱盡下歷既如破竹岑岡勢若摧枯神人之積憤以紓士民之倒懸頓釋所據効勞各官功次頗多均乞題請優錄以勵其後等因具呈到臣據此伏念六月出師雖犯兵家之所忌而偏旅入隘益見士氣之爭先扼其吭而拊之背賊已胆寒聲言東而擊其西勢成瓦解掃空鼠穴馘盡梟雄招集諸保之脅從收拾四縣之疆土班師之日禾稼登場山川如洗戴白垂髻懽呼滿路此皆邱賴皇上神威遠鎮聖武布昭及廟堂訏謨碩畫動授神算以故不踰浹旬

成功頓易第搗巢文武各官屯兵兩月暑雨炎蒸之苦鋒鏑衝犯之危盖所弗免臣不敢不爲評叙切照分巡嶺北道李佑寅畏克持小心勇決可當大事察賊情如行熟路料事幾不爽秋毫連年閩廣之師賢勞已懋六月下歷之役功偉而竒分守嶺北道蔡文温恭自將沉毅能斷督餉而委輸不匱剔弊而出納惟明邊徼馳驅已久戎務裨益良多叅將蔡汝蘭志專立功身能犯難潛師賊庭彷彿半夜而入淮蔡奏功旦夕依稀八日而破洞庭仍管安遠縣事同知李多祚德可潤身才堪治賦以儒紳親戎伍聲色不動而縛賊魁以誠信馭狙詐撫字有加而安反側聿收保障之功永稱干城之寄長沙營把總暴以平等深入羊

腸之險巢體被傷而氣彌壯先登烏道之危寨額流血而戰益酣乘堅如拉朽摧枯冒暑而斬關陷陣贛州府知府黃宸威後施恩撫中藏勦推心委信致克殘之入網隨事激發鼓將士之合機推官蔡民望群策畢用大難共紓委運糗糧絡繹相繼紀驗功次綜核惟明南安府知府吳炳庶二府屬縣知縣陳潤等或扼守要地足壯先聲或接應軍需更資近助以上文武諸臣伏乞皇上俯念犬馬微勞勅下兵部再加稽核查照先臣王守仁勦平桶岡浞頭事例將各官功次分別陞賞以勵其後爲此具題

平下歷疏

臣奏爲官兵血戰搗平稱王逆賊堅巢飛報捷音事據江

贛州府志

卷四一

奏疏

二十

西分巡嶺北道副使李佑分守嶺北道叅政蔡文呈淮南贛叅將蔡汝蘭手本開稱淮南贛軍門牌面備仰二道密會本職統督仍管安遠縣事贛州府同知李多祚坐營都指揮王汝澄萬安營守備董龍長沙營把總暴以平等各部兵共四萬三千餘員名於本年六月初二日申時自龍南安遠起營進勦下厯賊首賴清規等遵依於初三日破巢開刀起至七月十五日止總計生擒賊王賴清規有名賊首蕭祥鸞賴清重等共五十六名有名賊總賊甲鄭守思吳拱等六十八名斬獲賊首從羅正道謝衡等共二千六百十二顆俘獲賊屬男婦共三百五十名口牛馬二千四百五十一頭匹器械共一百七十七件救出被擄男婦

三百二十餘名口招回被脅人口共二千五百七十名俱
經解送紀功官贛州府同知趙時齊推官蔡民望紀驗轉
解外其被擄男婦當即審明釋放牛馬遵即給賞有功兵
士招回復業新民會同同知李多祚龔有成量給田土安
插造冊繳報等因到道隨據領安遠哨同知李多祚坐營
王汝澄守備董龍把總暴以平等各呈報相同據此按查
前項逆賊彼因各官陞遷交代又值大征張璉之後福建
興化府被陷潮州倭寇正熾鄰近多故事難兼舉只得從
宜招撫冀其悔悟自新不意兇惡如故四十四年三月叛
招糾黨分夥出劫崇義安遠信豐會昌南雄等處也方隨
奉本院牌面前照得三巢賊賴清規等據險鼎峙稱雄隨

撫隨叛稱兵已數十年殺人以千萬計王法所不宥天討
所必加者也第連歲用兵軍餉缺乏若待三省會師剋勦
終爲築室道傍今當乘勦二源兵威移向三巢但事勢有
緩急用兵有先後三巢之中惟下歷包據遼廣須先併力
攻堅則瑕者易以爲力除一面具本題知及移鎮信豐督
征外牌仰兵備道即便會同分守道照依後開單數調發
各枝官兵行叅將蔡汝蘭統領刻限本年六月初三日寅
時前進將下歷巢賴清規等賊乘其懈怠盡數洗勦以洩
衆憤但賊性狡譎異常彼知官兵進勦必蹈舊轍分哨流
出湖東西福建地方撲滅愈難功未及成謗議橫起須另
選勁兵二萬委能幹將官統領各屯劄要害以防奔逸該

道仍親詣龍南信豐等處紀驗功次事完一併彙造文冊
繳報等因奉此遵照監督各官兵進勦去後今佳據各呈
報前因實計擒斬共三千一百四十三名顆所據効勞各
官功次頗多均乞題請優錄以勵其後等因具呈到臣據
此爲照江西龍南下歷賊首賴清規蕉坑賊首蕭祥鸞楊
梅牌賊首邱清仰熱水賊首徐仁安汶龍賊首王鳳陽胡
坑賊首胡應川安遠縣小石保賊首吳珊大石保賊首楊
明甫伯洪堡賊首劉喬松龍泉賊首龔大權信豐南坊上
里賊首袁尚信廣東龍川縣羊石寨賊首李世栢饒鉞寨
賊首宋伯容等皆異常元兇共相依附蟠踞兩省黨類萬
徒十數年來虐焰滔天罪大惡積幸而天心助順神謀與

能機至時會一朝殄滅其高砂謝允樟等自下歷洗蕩之
後聞風膽落日爲陳詞哀乞祈須臾無死見在夥類不滿
千人勢必束身投降仍望朝廷大施好生之德姑貸其死
以示恩信如其稍稍猶豫便當督兵誅之一鼓可滅江西
賊巢大約已完獨廣東岑岡尚爾負固未服乘勝長驅非
不易易但一面之師恐賊遠遯竟撲空巢無補於事容臣
嚴督嶺北伸威諸道相機而動決不敢留賊以遺君父之
憂再照廣東之界山川風氣險惡特甚歷稽往牒自是盜
賊淵藪議者皆欲於下歷處所建縣置吏治教并施謀非
不良第龍南安遠信豐諸縣壤褊戶稀而和平又屬草創
新邑均不堪再割不如相度形勢築立城堡或設守備捕

盜通判各一員領兵一枝鎮撫其中事頗簡省更爲建造社學選擇耆儒訓誨子弟薰染日久數年之內或可化頑梗之俗爲禮義之鄉須其底定然後官兵以漸裁革則久安長治之策無踰於斯臣已案行守巡二道博採輿論查議停當至日另具奏請如蒙皇上俯念將士蕩平險巢犬馬微勞勅下兵部再加稽核查照先臣王守仁勦平桶岡洎頭及近年廣東大征事例各將官功次分別上請陞賞以勵其後其已獲首惡行臣就近會官處決施行則賞罰允當而人知所激勵矣爲此具本謹題請旨

建定南縣疏

張 翀

奏爲懇乞聖明俯賜建縣以圖永安事竊以江西龍南高

贛州府志

卷四一

奏疏

二十三

砂下歷三堡界連廣東和平岑岡離縣遙遠政教鮮及以致人民頑梗有年近該前提督都御史吳百朋撫勦之後題奉欽依於下歷築城建館移置捕盜通判主簿統兵五百名專一駐劄防守其下歷巡司移於高砂蓮塘亦築上垣一座添兵協守以遏岑岡來路又於二處各建社學一所選擇生儒訓其子弟已經通行欽遵查照外續據龍南下歷高砂等堡新民鍾仕任等連名具狀告稱祖父良善禍因兩省交界僻居山谷每由小忿逞兇報復倚山傍險遂成巢穴去年大兵勦滅渠魁隨蒙設官鎮守萬無反側但廣東上下陵等處俱係發賊之源本府信豐之南坊上里員魚逕腦之大石小石伯洪三堡亦是多賊之區懇乞

照南安府桶岡峒改建崇義縣至今太平乞除鎮守巡司等官弔割各坊丁糧共建縣治地方有賴又據和平縣新民江月照等具狀令江完抱告民等幸蒙超活矢心向化乞將上下陵烏虎鎮饒鉞寨等處與高砂新民總爲一縣等情該前院案行分守嶺北道廣東伸威兵備各道委官查勘從長會議去後隨據廣東伸威道副使張子宏回稱烏虎鎮爲和平縣藩屏若槩割之則不成邑又經牌行嶺北道先將蓮城土垣築完其設縣事宜候至日另奪等因在卷臣於隆慶二年六月蒞任催據守巡嶺北道右叅政殷從儉副使董時彥會呈奉臣案驗前事依蒙轉委贛州府知府黃宸親詣龍南下歷等處將應割地方逐一踏

勘隨據本官備將民情土俗一一詢訪勘得龍南縣應割下歷高砂橫江三堡人丁四百五十九丁田塘地糧五百六十五石九斗零安遠縣應割大小石伯洪三堡人丁一百二十一丁田塘地糧五十六石零信豐縣應割南方上里員魚逕腦及潭慶上堡龍頭嶺內坑居民郭信賜等告願割人丁四十四丁田塘地糧五十六石二斗零三縣通計人丁六百二十四丁秋糧六百六十七石零人丁每四丁折糧一石共折一百五十六石丁糧二項通共八百三十三石零編派里長四十名每名糧二十石八年每年輪當現年四名就於蓮塘建立裁減縣分知縣典史教諭各設一員官吏俸薪馬丁門皂工食每年共該銀二百七十

九兩零查於贛興等縣裁減冗員之數以充之生儒廩糧齋膳并祭祀鄉飲答應使客等項公費每年共該銀五百二十六兩零將沒官田租稅以供之斗級禁子舖司弓兵等役工食每年共該銀二百零七兩六錢以分割丁糧人戶編銀募充民壯一百五十名就於龍南信豐二縣裁革機兵名數內協濟龍南縣一百名信豐縣五十名每名該工食銀五兩二錢共銀七百八十兩行令二縣遞年照數解發新縣轉給分割丁糧只照在冊輸納秋夏二稅凡一應加派姑不責備如此則新民賦役頗輕從善亦易原額巡司官兵仍於下歷駐劄防守鎮守通判仍舊管理巡捕又查得蓮塘原議築土垣城樓窩舖等項工料銀二千兩

先解發一千兩除已支用過外尚存銀一百三十一兩零及下歷新城公館原議二料支到銀一千一百六十一兩零二處共存銀一千二百九十三兩零見貯縣庫其蓮塘新役先該同知李多祚查估建築城垣啟造縣堂儒學分司官吏衙宇各處用杉木二萬二千一百五十根及查分割立縣界內杉木甚不足用未免取之不割之地價值難以估數其餘包砌城樓窩舖并築土垣應豎公廨合用磚瓦石灰鐵釘木匠土工油漆等項共工料銀六千三百一十三兩零除已築城心土垣并先燒成磚瓦等項共支銀八百六十八兩零應該准作前估銀內之數今除龍南庫貯下歷蓮塘二處支存銀一千三百九十三兩零外尚少

銀四千二百五十一兩零合於原議未抵贖價銀一千兩并本府原額抽船穀稅銀內湊給應用各該公廨杉木未估價值□興工之日另行申請等因到道爲照設官鎮守雖可彈壓於一時而統轄無歸必難維持於永久所據設立縣治以馭新民誠爲久安長治之計但查烏虎鎮等地既難分割岑岡上下陵先蒙廣東巡按衙門題准編立保甲定委通判鎮守悉屬該省節制見在和平縣辦納差役與岑陵丁糧似難分割只以龍南信豐安遠三縣丁糧編派里長輪流應役就於蓮塘立縣屬贛州府管轄各縣官吏俸薪馬丁門皂工食生儒廩糧齋膳鄉飲祭祀公費斗庫舖司弓兵民壯各項俱如本官所議縣治雖小而各項

公供自有當賦實足以垂永久又包砌城垣建造縣署公廨儒學廟宇除木價委官採買另議外合用一應公料有支存解發軍餉銀并未解抵贖及船稅可以取給并已處置停當合候通詳允日次第興工候工完備造冊繳報原調鎮守下歷通判仍回該府巡捕蓮塘巡司仍住下歷防守原發機兵土兵盡行裁革新縣民壯一百五十名仍於三堡土兵選充再照新縣草創政教尤在得人必得賢令以治之明師以誨之若待銓除新官不知民情土俗有難責成行據該府查得信豐縣知縣陳瀾政治清明操守貞潔風土民情熟諳堪以調理但歷任已幾三年相應擬陞俸級令其久任成功破格超擢又查得寧都訓導張大猷

青年篤學儀範足以善俗但歷任已逾三年相應擬陞教諭俾之久任潛陶頑梗待其教成另議陞擢如此則政教得人自可遵治安之效新民永服而地方攸賴矣等因到臣該臣看得三巢地方勦之於先既足以畏其邪心撫之於後又足以興其善念且又見今兵威大振郡牧推誠向化之心可保不變今據高砂堡新民懇求建縣意在真心向化臣等重覆委官查勘叅之輿論酌以時宜詢諸黨正父老俱各懽呼似應俯從但新縣開建必須幹濟得人查得信豐縣知縣陳瀾志甘清苦才優幹濟歷任年久熟知民情使牧新縣之民必有和輯之效寧都縣儒學訓導張大猷年青質美才學優長敦崇禮教之規足稱風化之表

伏望皇仁軫念群生乞勅下該部再加查議如果臣等所言不謬將蓮塘建立裁減小縣銓選知縣典史各一員知縣就將陳瀾加陞五品俸級仍管新縣事務訓導張大猷陞授教諭典史另銓庶使熟路輕車便於任事其信豐知縣寧都訓導各員缺另行選補蓮塘巡司照磨住守下歷督捕通判捕盜主簿俱回原任管事再照分割丁糧除廣東不議外止割龍南安遠信豐三縣共八百三十一石零編派四十週年里長輪流充當共建一縣隸贛州府管轄縣名恭候欽定合用本縣印信儒學印記仍候該部請鑄降發其前項官吏俸糧柴薪馬丁及門皂庫禁斗子齋膳夫機兵等役工食悉如該道所議其城垣修築并學校及

各衙門公廨一切應用錢糧取之船稅誠不足用合無嚴示沒官租稅銀兩酌量動支俱候命下之日行臣等督發該道就委知縣陳瀾等總理工程次第興工舉行尚有未盡事宜照時斟酌務得一完備庶幾縣立而民賴以安政行而俗因以化矣謹具奏聞

分建長寧縣疏

吳百朋

臣照得安遠縣黃鄉雙橋等堡地方離縣三百餘里與廣東平遠和平龍川等處接壤實爲江廣兩省上游層巒疊嶂不逞之徒向來嘯聚其中歷稽往牒如鄺子安黎仲瑞王霽壤高安陳良玉張士錦等相繼猖獗積久而後勘定正德五年該縣貢生林大綸等具呈乞於地名李福灣三

贛州府志

卷四一

奏疏

二十八

省巢峒之衝建立州治以控制之竟因會議遷延遂使三百餘里土地人民盡沒於葉楷之手迄今八十餘年橫極而禍烈矣近賴朝廷威武神靈逆楷伏誅然特一時之利未爲永久之規須趁此時會開設縣治控制要衝敷聲教而化導之如先臣平桶岡而建崇義平洄頭而建和平平高砂下歷而建定南皆杜遺孽潛滋之萌貽生靈久安之休不然隄防疎濶萬一有復如楷者誠不知其終也爲今經久之圖孰有踰於建縣者哉但恐該里分無幾不堪再割審據各民執稱會昌長河一帶壤地相連堪以割附及要將三巡司裁移以省經費以據要害未知事體有無妥順人心果否樂從與夫一應建築事宜仰守巡道督行該

府委官前去馬蹄岡踏勘是否風氣完聚堪以建縣及一應事宜具由呈詳以憑處奪此係設縣安民地方重事各官務要計處周悉經畫曲當毋得苟且雷同致有遺議到道行府委安遠縣陳行可召集地方劉學橋等公同躡勘得地名馬蹄岡堪立縣治畫圖脩申又經會委本府推官賴萬嶼重復勘定俱無別議該本府查得安遠縣原額五里計五坊二十三堡今議分割地名黃鄉雙橋八付腰古頂山勞田滋溪石痕石溪尋鄔大墩桂嶺水源三標南橋一十五堡共計人丁五百五十二丁官糧六石二斗五升一合七勺一抄二撮民糧二百二十七石二斗一升一合一合八勺五抄人丁每四丁折糧一石共折一百三十八石官

民丁糧三項通共三百七十一石四斗六升三合五勺六抄二撮編派里長二十名每名丁糧一十八石五斗七升三合一勺七抄八撮每年輪當現年二名又查安遠縣五里除割二里建縣外本縣止存三里人丁五百八十八丁官米一十石一斗三升八合五勺八抄一撮民米一百七十一石三斗五升二抄又查得會昌縣長河等堡切近安遠地方應須割補安遠湊成四里又安遠會昌二縣冗員相應裁減主簿各一員訓導各一員及長河巡檢司界在安遠新縣之間以爲虛設俱當裁革尚存黃鄉大墩板石三巡司以板石仍屬安遠以黃鄉大墩分屬新縣但查新縣地名丹竹樓離縣頗遠最爲險要合無將大墩巡司移

至丹竹樓以備防守又其城垣廨宇之建各項錢糧經費取足於葉賊田租與裁安遠會昌二縣主簿訓導各一員長河巡檢一員事體委俱妥當民情無不樂從無容再議除責成守巡二道專委推官賴萬嶼相度料理以俟及時興工伏乞勅下施行欽定縣名鑄造印信印記銓選知縣典史教諭各一員前來經理至於分析圖里割屬移置巡司裁革安遠會昌二縣主簿訓導巡檢諸凡事宜各如所議舉行庶吏治張而聲教易達盜源息而奸宄不容自茲以後地方可以永保無虞矣萬歷四年二月二十九日題

平黃鄉疏

江一麟

竊照南贛山谷險阻往多賊窟節該先任撫臣前後經畧

贛州府志

卷四一

奏疏

三十

漸盡勦除遺有黃鄉溪尾稔賊葉楷盤踞地方延袤三百餘里田地盡其占據黨與二三萬人四季輪班四出劫掠流毒閩廣江西地方難以盡數正德嘉靖年間先臣王守仁殷從儉等用意羈縻將聽其輸心向化豈意其負固怙終驕恣益熾方今聖明之世惡乎可容臣受事以來每集道府等官密相籌議隨據守巡嶺北道叅政張士佩副使朱茹贛州知府葉夢熊陸續開陳逆賊巢穴深固黨與衆多必須用謀行間先收其黨羽之心而後乘機觀變因令贛州知府葉夢熊票行安遠縣知縣陳行可多方招致萬歷三年四月有石溪雙橋等堡子弟賴承揚等十一名本月又有勞田等堡子弟賴君貴等二十八名前後資遣父

兄送至鎮城聯之以塾師居之以學舍養之以衣食推誠訓育加賞銀牌紙筆以示鼓舞賊楷聞之亦遣其子盛發盛森盛大名雖來學實懷覬探之奸臣一面一例推誠優以德意一面密訪諭令守巡二道府縣正佐各官多方開諭順逆利害積之數月保民劉載永嚴順民尹明遂溫時選等各曉然知官法可恃以生全遂萌思脫逆瞎之意呈率數十百人群赴院道請添縣治楷男盛和盛發等亦書楷名呈同前請俱經批行議勘隨該道府議稱嚴順民等衆心歸正乘時可圖安此一方臣假以把總名色兼給銀牌花紅示獎嚮順用以固結人心一面辦花紅銀牌差贛縣典史汪鳳山獎勞楷家旬日後典史回贛楷忿載永等

背已向官輒豎旗勒兵聲要夷滅各家從此七家構怨自相瓦解臣又差哨總劉順昌等齎牌諭楷當審時向治母仍抗違國法楷猶怙惡反留順昌日遣賊徒劫掠居民臣隨諭知府葉夢熊密招楷在鎮操練竒兵梁正環陳俊賴琪駱賓等從守計散楷兵若散一人者與斬獲一人同功又票約生擒葉楷者賞銀一千兩生擒楷弟男一人者賞銀一百兩餘黨不助惡格敵者悉給免死票三千張降旗數十使伺楷變行事又諭守巡道督雙橋上黃鄉等九堡保長副及劉載永嚴順民等各令整礪兵械隄備調用又牌行伸威湖東西等道各備兵伏守要害防賊奔逸本年九月十四日據安遠縣揭報初五日黃鄉賊曾五滿等打

劫石井張國玉家財物被雙橋保長巫順等相截殺九人
二十一日又據安遠報賊葉楷統兵千餘圍雙橋堡捉
殺石溪良民駱萬財駱萬輝各家二十餘口劉載湛家八
口十九日又報楷姪葉盛乾挈帶兄弟男婦偷身出縣稟
稱葉楷要統衆兵反出本縣攻殺該臣牌行副使朱茹督
行所屬府縣衛所守備把總等官各將所部官兵該道就
便相機凡各處要路預集鄉兵把截母容遁逸并差官賫
捧旗牌便宜行事又牌行該道轉行叅將郭千統領官兵
三千餘員名前後勦殺黃鄉葉賊從東路勞田堡進又牌
行安遠縣知縣陳行可督率該縣機兵并附城鄉兵一千
八百名從西路太平堡進定南縣典史張尚禮統率鄉兵

二千名從南路大小石堡進贛州府通判徐廷輔贛州衛
千戶孫韜李賓統領烏鎗手等四百名協同石溪雙橋等
堡鄉兵各從本堡便路進入黃鄉搗巢去後本月二十三
日隨據副使朱茹督據安遠縣揭報黃鄉鄒賢楊才亮謝
用聲聞官兵大征恐被槩誅赴縣告照歸順者時已八九
百久來尚源源不絕本月二十四日准叅將郭千報稱二
十三日卯時楷率賊徒四百餘名反出縣有石溪等堡把
總劉載永哨官嚴德恕等隨督各兵分哨截殺當陣將葉
盛秀殺死賊黨外見官兵雲集內聞梁正環等降票免死
各人星散楷勢孤窮遁回賴舍廟藏躲衆兵隨將本廟圍
住堆草放火將楷同妻林氏等焚死屍首現存餘賊潰竄

當被各兵搜獲葉盛清葉盛瀾葉永漢葉永淵四名本日
石下千長胡仕明等截殺賊首葉盛文并長幹林大美林
陳生擒林大旺等六名顆奪獲大旗一面南橋雙橋堡杜
喬挺賴思明等截殺賊首葉盛穆葉盛稱首級二顆黃鄉
保長副林愛葉益等統領鄉兵截殺生擒首賊葉桂斬獲
旗頭賴二仔等首級二顆白綾旗一面馬一匹又據典史
張尚禮揭報截獲葉楷部賊劉昂等一十八名口又鄉兵
葉崇卿等拿獲長幹賴廷真馬廷福男婦十口雙橋堡隘
官鄭穆等截殺賊首葉盛嵩葉盛嶽并黃傘一把牙轎一
乘二十七日又報滋溪堡把總尹明遂截殺賊首葉
盛隆首級一顆石溪堡把總劉載永帶兵古遂仔促獲賊

首葉盛秀妻王氏男旦孫送縣二十九日又據雙橋堡哨
官賴思明鍾慶等搜獲賊葉盛科賊甲吳富珠等七名外
斬獲吳吾滿等首級七顆俘獲楷妾葉氏葉盛龍妻郭氏
葉盛科妻賴氏幼男葉二滿并續解鍾珣等首級七顆及
俘獲賊婦易氏等一十二名口是役也官兵逼巢而賊黨
內潰鄉兵効力而渠究授首糧餉不費功收萬全謀之數
月之難成之一旦之易是皆仰仗我皇上神武懋昭廟謨
宏遠故能坐勝默成如此之捷也除將生擒各賊審別招
詳賊屬變價充賞贓仗收庫田地入官降民安插軍前供
事千百戶經歷等官及該鄉兵夫等分別量行獎賞建縣
善後事宜另行議奏外爲照効勞官員如分守嶺北道右

叅政張士佩志切匡濟材擅經綸主設間內應以攻其心
議衆建雄長以分其力心思既竭猷畫無遺分巡嶺北道
副使朱茹才識兼優竒正並用博延輿論動中機宜一得
願効其謀三軍各奮其力二臣功當首論贛州知府葉夢
熊英風遠度偉識訏謨廣招子弟以修文密布機籌而潰
寇攻心獨苦勞績居多宜與張朱並從優擢分守南贛叅
將郭干謀勇並資韜鈴更諳威聲早振遠禡逆黨之魂馳
禦兼程即授渠魁之首安遠縣知縣陳行可志務安民能
堪應變詣巢行論賊穴之艱險咸知禦侮盡心逋逃之黨
與悉散早稱循良之績今著獲賊之勞當一體重加賞錄
定南縣典史張尚禮承委効勞臨機設策防隘而鼓鄉兵
贛州府志

卷四一

奏疏

三十四

招降以孤賊勢功亦可嘉贛州府通判徐廷輔署會昌縣
事贛州府推官賴萬嶼定南縣知縣洪可弼信豐縣知縣
黃鰲龍南縣知縣王繼孝贛縣知縣陳一魴南贛坐營劉
用光羊角水堡把總王應斌安遠縣主簿胡瓊或親詣督
兵與有堵截之功或處辦軍需并効策應之力以上各官
俱王事有功亦應并論同沾賞賚者也及照已獲焚死賊
首葉楷身屍尚存合無剖割剝屍并見監葉桂等會官處
決梟示再照楷子葉盛和等向在鎮城未與同謀罪人不
孥殺之既所不忍相應解送戶部編發口外爲民俱恭候
明旨至日施行

國朝

薦舉疏

劉武元

爲特舉賢守苦績仰祈 聖鑒事竊照贛郡衝殘一省獨居其最同城巡道遷轉不一年來與臣共治者惟贛州府知府郎永清端毅之品英敏之才嚴禁火耗而人人樂爲徵輸痛革行戶而芻粒並無擾取其力行保甲也務靖藁奸之藪其釐剔衙蠹也絕無勾攝之害清獄囚而監無濫禁興文教而士習端修且本官莅任旬日正值楚警震鄰臣委以閱視城垣即捐資修葺共築頽城三處約二百餘丈鼎建望江樓三層城樓四座馬道十面不費朝廷金錢而金湯鞏固及滿師進廣臨贛臣督令備辦糧草委官分任於炎天烈日之下料理支放咸得其宜槽桶鍋刀諸物贛州府志

卷四一

奏疏

三十五

齊備搭蓋大棚廠三座馬蓬數百間不動民間秋毫而支應裕如靖南將軍恰哈木與諸大人咸亟稱之觀其事無難易力任勞怨其忠君愛民之心臣所身親目擊者何敢沒人之善而默然已乎此一官者英齡朗識政敏心慈士民交誦其德兵將咸服其能伏乞我

皇上勅部覈覆如果臣言不謬即祈恩賜加錄以爲郡守之勞苦者勸庶吏治民生裨益匪淺矣

請除豁荒蕪疏

蔡士英

爲覆查荒蕪據實確報仰祈 聖鑒事順治九年三月十三日准戶部照會爲再陳虔屬傷殘輕重之狀酌量蠲徵荒熟之數仰祈 聖鑒急救生靈事本部題覆南贛撫臣

劉武元題報南贛二府詳列災傷併應免分數該蠲米二萬四千八百七十石但前江撫臣夏一鶚疏報通省荒蕪田數與南贛撫臣劉武元疏報南贛二府荒蕪田數內中數目不符檄臣查報臣即轉檄各府州官查報間百姓之呈報荒蕪者疊案盈几觀其人無非菜色聽其聲莫不哀痛呼號環繞馬首懇乞覆查臣以爲前此報數已定豈有遺漏及詢之司道訪之父老始知從前查報之時尚有地爲賊踞今始恢復者有民徙他鄉今始歸來者有閤門遭戮開報無人者有逡巡退縮訛傳報荒即作官田者以致前撫贛撫各報參差於是即日備牌行司移道令其單騎履畝逐一清查具報隨據各屬備造清冊內開有主無主

贛州府志

卷四一

奏疏

三十六

荒蕪田地共一萬八千五百畝零較前所報數更加浮臣思江右殘黎歷遭焚殺其慘倍於他處再照各郡所屬在在皆盜殺之而叛撫之而亦叛者豈盡樂於走死哉正恐今日歸來明日即追徵荒逋死於鋒鏑與死於鞭箠一也故寧從賊而不悔耳夫有荒而不除與除之而不盡均貽累於百姓故不得不徹底清查以廣布我皇上如天之仁解斯民倒懸之厄也伏乞皇上軫念殘疆立賜殊恩勅部速行議覆准與除豁臣等遵奉施行

請蠲江省順治五六年漕欠疏

張朝璘

爲懇救水火事據江西督糧道左叅議范竒才據闔省里

民江萬等狀訴呈詳到臣冊開未完漕折銀五年分九萬七石七十餘兩六年分六萬九千二十餘兩七年分八萬三千四百三十餘兩該臣看得江西自金逆叛變民遭擄殺寸土不寧五年構逆六年始復省城七年之後驚鴻稍集兵馬蹂躪到處廢耕兵凶之餘加以饑饉又贛南湖西疫癘大作病死無算伏思
皇上宵衣旰食無刻不以憂民爲念臣叨恩撫治目擊顛連猶忍心敲比而不據實入告是上負國而下病民臣罪滋甚今圖救全生靈之計惟有籲恩蠲免之情伏乞
皇上俯念江省實屬兵荒之餘將五六年未完銀米特恩蠲免庶災黎得荷再生且新漕不致掣肘矣

贛州府志

卷四一

奏疏

三十七

請清查民田荒熟疏

佟國器

爲分別官民田土仰祈睿鑒以順民情以清兵餉事案准江南督臣馬鳴佩咨開准戶部咨開各省地土凡上納錢糧者爲民地不納錢糧者不分有主無主俱爲官地交與屯道屯廳招民開墾等因奉

旨依議欽遵轉咨到臣在案於順治十二年九月十六日據江西布政使南瑞道叅議遲日震呈解秋季兵餉二萬兩內稱南贛二府兵餉內有主荒蕪已奉部咨奉有俞旨准照十二年編派起科止除無主荒缺外該實征銀五萬八千四百三十二兩零查本年春季餉銀未經奉文之先本司止將有主開墾者扣除今查部咨有主荒蕪准

於十二年起科其春季已解之餉仍應扣出合春夏秋三季共扣除一萬七千一百四十六兩九錢八分零又據贛州府知府郎永清詳稱十二年八月忽蒙藩司坐派有主荒蕪俱於十二年起科解給奈各屬俱係兵火彫殘之後今糧將完而忽加徵窮民勢必逃亡竊恐成熟之田頓轉荒坵併報各屬已墾未墾數目其未墾願交屯官等因又據南安府知府胡順忠詳報各縣有主荒蕪已墾未墾數目其有主未墾荒田百姓願將入官等因到臣據此該臣移咨江西撫臣郎廷佐內開有主荒糧一項於十二年編派起科此江西省前任蔡撫院之題准而行於江省者也自十二年爲始不納糧者不論有主無主俱爲官地交付

贛州府志

卷四一

奏疏

二十八

屯道廳開墾此奉

旨通行於各省者也普天率土同是朝廷赤子江省不當獨異但各州縣有主荒地如果已經開墾或雖未經開墾而本主不願入官願應糧者自應遵照十二年編派起科之例照額完納如贛州府屬之贛縣石城雩都三縣有主荒田俱已開墾興國縣已墾約十之三寧都縣已墾約十之八南安府屬之大庾南康崇義上猶四縣有主荒田已墾約十之二今除已墾者於十二年起科外而未墾荒糧各屬申稱百姓一聞荒熟並徵之令匍控載道泣訴盈庭不獨有主之荒徵而難應切恐已熟之田拋而成墟情願退歸屯政則民瘼之當念一也贛標兵餉歷來壓欠自

前任宜撫院以十一年截算另起而以前欠給餉二萬二千九百有零欠給米三萬九千一百有零各兵呼籲不絕於門今有主荒田一項部文原行補徵起解而署藩坐扣兵餉以莫急之兵餉而待飼於荒郊則機兵之當憫二也再照部文不納糧者原當悉歸官地況民之自願入官者乎若欲攤派熟田勒令包賠而拋荒土田不交付屯官徒茲鼓剥之慘終無耕獲之期則屯政之終廢三也當茲經費缺□司農蒿日極應設法勸輸惟是南贛徵荒一議有萬萬不能行者如何而便於民如何而便於兵如何而與屯政不致相違仍扑裁示以使□一等因咨移去後隨准江西撫臣郎廷佐回容內開有主荒田十二年分同熟地

一體徵糧蓋因部文有不納糧爲官地之行前撫蔡部院恐田既入官民失恒產是以特疏題請於十二年起科開墾還民爲業是惟恐以有主之田入官爲慮而不虞有情願入官之百姓也今准大咨即備行司道議確具詳以憑覆覈會題等因回咨到臣准此於本年三月初二日據嶺北道副使史燧呈奉臣牌節催南贛二府有主無主荒地已墾完糧者爲民地若干無主荒地并有主荒地不能願墾入官者爲官地若干脩造清冊確看通詳以憑會題等因該本道看得贛南二屬有主荒蕪一項前撫蔡部院特疏具題請於十二年起科蓋惟恐以官地而慮民之失業也詎意一聞開徵之令二屬萬民紛紛籲訴在有司則以

意公爲職既奉派徵敢不催科在小民實爲彫瘵之餘何堪賠累若非仰邀題明爲民請命勢必至縣官日事敲朴下民日見逃亡恐已墾之地土漸成榛莽其未墾之地土何計包賠賦缺餉匱更可慮也今據贛南二府具報前來謹將有主無主荒蕪已墾完糧者爲一冊無主荒蕪已經入官者爲一冊有主□無□不能開墾願入官者爲一冊合侯題 允之日歸於屯官可也等因具詳到□據此該□看得蠲免荒糧所以豁□賠之累而勸耕作之動也第其間或有已墾未報致滋侵隱之弊奉文以十三年爲始不納糧者不論有主無主俱爲官地則是既沛浩蕩之恩復寓綜覈之法矣江省前任撫臣蔡□莫因慮有主入官

民失恒業具疏題准有主荒田於十二年編派起科南贛二郡之民一聞徵荒之令呼號載道願將有主之地交送屯官道府據以申詳臣念民願入官則其力不任耕可知力既不能任耕而欲攤派熟田虛賠賦役徒煩敲□何益催科且贛營兵餉壓欠甚多今署司復以荒糧一項坐扣新餉百姓有剥膚之痛兵丁有枵腹之嗟臣目擊虔南地方瘠薄歷年鋒鏑摧殘荆棘塞路虎豹晝遊今查有主無主荒蕪田土原報五萬零四十一石四斗四升零開墾過有主無主荒田共一萬七千三百二十七石二斗二升零應於十二年起科無容再議又無主荒蕪一萬四千九百四十七石零已經入官其有主未墾荒糧共一萬七千七

百四十石二斗五升零既奉有十二年爲始不納糧者有主無主俱爲官地交付屯官開墾之文又奉有十二年編派起科之文未定畫一臣伏讀

勅諭內賦役一欵隱漏者自首免罪包賠者准其控告察確即與豁免欽遵在案是以特疏題明伏祈准照不納糧爲官地之例交付屯道屯廳開墾則民隱既得寬恤軍需不致違悞屯政亦便興舉矣除將各冊移送戶部查覈外謹會同江南督臣馬鳴佩江西撫臣郎廷佐合詞具題伏乞

勅部查照議復施行